

續修陝西省通志稿

第四十七冊

卷八十四至八十五

續修陝西通志稿卷八十四

人物十一

列傳補遺

張聯輝孝義廳人由拔貢任教育事務三十餘年終身不入公門慨然以提倡教育爲己任卒致積勞病故邑人士感念不忘呈准祀鄉賢祠

蔣若采原名若拙字亮揆號少園長安人曾祖兆奎見前傳祖蓮二品廕生侯銓主事父立誠嘉慶己卯進士官編修若采由道光辛卯舉人援例捐知縣選四川安岳縣有政聲多去思調署成都首邑時將軍某署總督若采以禁賭懲旗丁觸怒之首府代爲緩頰而若采強項不少屈某銜恨之故事首縣期年必量移調劑若采逾期數月不得代賠累巨萬乃請效力川東軍務暫避焉某敗

登卓薦除西陽直隸知州未任攝忠州甫四旬丁內艱以母病迎養未遂哀毀骨立又累於成都交代不能奔喪釋服後猶不御酒肉者四年餘夏一席冬一毡一被日僅一炊至不舉火制府聞其名傳見亦不往久之同鄉官代完公帑呈請回籍適黔匪擾蜀上游奏留勦辦事平保知府乃旋里補制同治初回亂作陝撫奏派督餉若采酌盈虛裁規費五年赴引奉旨以道員用抵蜀監試鄉闈病卒年四十九識者惜之弟若訥以優貢隨欽差張芾殉回難贈道銜子善譽咸豐庚申進士刑部主事

張曜斗字星樞長安人光緒壬午舉於鄉癸未聯捷成進士以即用知縣分河南權永甯下車值歲旱曜斗清理積案平反疑獄未幾甘霖疊沛邑人頌德尋補實任雨雹成災鄰邑方請賑曜斗曰哀鴻徧野待哺孔殷何拘常例爲遂擅發倉穀以賑乃稟聞邑多

盜劫設法緝捕四境以安其他興學勸農勵精求治大吏器重保

在任候補直隸知州陞補陝州未任卒年五十有二

採訪冊

李舒馨字桂齋號曉民咸陽人光緒戊子舉於鄉庚寅成進士以即用知縣分山東充甲午科鄉試同考官得人稱盛兩廣總督張鳴岐卽所得士也委辦安居鹽運分局有私餽千金求加鹽斤者舒馨力拒之尋補福山縣縣境芝罘山駐各國領事折獄持平華洋悅服得旨嘉獎以救護日本輪船活人數百保知府拳匪之亂力排衆議擒首惡保全甚多鄰境多蝗昕夕虔禱蝗渡海而沒人謂積誠所感大計卓異調補泰安未任而卒年四十九舒馨仕福山五年餘無一搶案先後破獲鄰封盜案二百餘起又捐廉增書院號舍膏火改設學堂置中外書籍施藥療疫捐餉助賑修理文武各廟資助同鄉戚族並爲本縣學堂捐購諸書不下數千金好

義若渴尤爲人所樂道焉

呂申字小溪號紫珩臨潼人藍田先儒呂氏之裔前明遷臨潼清道光初移居長安父炤林廩生官兵馬司指揮以獲劇盜功賞大緞二疋陞山東莒州州同未赴任值回亂奏派陝省團練積勞病故廕一子即申也幼慧能詩年十三邑文昌祠落成代父爲駢體文人稱宿慧旋入泮文譽日起肄業關中書院期爲明體達用之學由同治癸酉拔貢中光緒丙子鄉舉舉孝廉方正以知縣分山東先謁三原賀瑞麟得聞爲學大旨抵東省權平陰縣縣本饒瘠復值水患乃周歷四鄉詢民疾苦謂非先減漕價不可幕友尼之申曰我盡我心遑恤其他暇則以造士捕盜爲急務貢生何某爭產成訟申令先應書院課試以兄弟怡怡命題文頗佳遂批卷尾云生能爲孝友之文不能爲孝友之行何也諒由本縣涼德無以

感格自疚自愧何以爲人上哉其人大慚相率息訟和好如初有
夜刼斃命案申見更夫足著兩色履異之一鞠而伏以河工保陞
直隸州知州與修山東通志年六十有三卒著有華潔館詩文集
金石考若干卷繼室武宜人號怡鴻知書能詩善畫著有儀光閣
詩集

雷天柱字石臣醴泉人光緒己卯膺鄉薦丙戌成進士授吏部主
事文選司行走奉職清勤吏胥嚴憚篤於友誼一諾千金京外同
鄉官皆敬重之而不可干以私在部十餘年學行艱苦公餘輒手
一編泊如也年六十餘卒於京

徐林字芮南朝邑人咸豐辛酉拔貢由侯選教諭改知縣分山西
歷任汾陽黎城平遙長治等縣陞署薩拉齊同知政聲卓著尤負
文名丁憂起復以知府歸原省侯補爲巡撫張之洞張煦及各大

府所倚重尋署太原府被誣罷官旋卒子孫流寓晉省政蹟失傳
高廷楨字幹臣邵陽人同治五年由附貢捐貲議敘知縣選江西
泰和縣歷任星子靜安靖元寶豐等縣前後幾三十年樸誠敏練
勤恤民瘼尤長於折獄日坐堂皇隨時審結吏役不能欺輿情愛
戴所去民思年六十餘告歸士民夾道跪送十數里不絕並送牌
匾衣傘多件以誌遺愛原籍廬舍燬於回變寄居同州郡城尋卒
廷楨性儉約而好義篤於友誼一揮至數千金生平未得科甲引
爲憾事捐助京師本邑會館銀千兩以惠士子其義舉多類此惜

後裔不振流寓他鄉政蹟失考

並探訪冊

吉燦升字劍華韓城人咸豐辛酉拔貢朝考一等以知縣分山東
知平度州幾十年政平訟理陞署泰安知府積勞保道員加二品
銜花翎朝邑相國閻敬銘撫東省時最爲器重光緒間巡撫李秉

衡尤傾心信任事無大小必諮之擢濟東泰武臨道臺署鹽運使按察使歷充河防賑撫賑捐各局總辦兼營務處事釐剔積弊綜核名實兵民愛戴輿論翕然其任濟東道也拳匪肇亂勢已蔓延大府議剿燦升單騎赴屬境計獲渠魁撫散脅從變定而民不擾地方得免糜爛厥功甚偉尋以腿疾告歸年七十餘卒燦升長身玉立能文善書仗義疏財尤多善舉惜後嗣避難他鄉生平事蹟著作多無可考

王鴻飛字緒雲原名炳堃字厚山韓城人祖逢時與相國杰爲從兄弟由乾隆丙戌武進士官至江西袁州副將父駿有孝行詳同州府志鴻飛劬於學工文善書爲巡撫林則徐所識拔延入幕學識日進以道光壬辰副貢任麟遊教諭被誣落職旋開復改今名咸豐辛酉舉於鄉同治癸亥成進士分發安徽知縣歷任蕪湖合

肥懷寧等縣擢無爲知州蕪當刼後民貧多盜鴻飛禽治巨盜胡老冒等地方乃安又捐廉建黌宮課生徒故事荒地報災每畝需費百錢鴻飛欲革之吏持不可遂定爲三十五文悉充書院膏獎曰以還蕪人合肥俗好鬪而健訟鴻飛請建文廟修包孝肅祠以厲風化平反死罪冤獄捕巢湖正兇抵法民頌神君豪猾斂跡幾於無訟懷寧衝要差徭煩重鴻飛捐廉應付絲毫不以累民故蕪懷兩邑各建生祠任無爲時值水災首請蠲賦坐是皖南五十四屬皆得緩徵州境南臨大江恃長隄一綫爲防二百餘里衝潰時聞鴻飛請借帑九萬金改修創築五閱月工竣積勞成疾卒於任一州三縣之民莫不涕泣相弔焉

黨蒙字養山韓城人同治癸酉舉於鄉光緒丙子成進士選庶吉士散館授刑部主事歷奉天四川各司主稿陞員外郎轉郎中充

律例館提調總辦秋審處各長官咸倚任之尙書薛允升爲律學大家尤相器重遇秋審疑獄現審大案必待蒙審察決定庚子出爲雲南臨安知府累署順寧東川等府卒於任性樸誠而敏練簡重深沈言動不苟官京曹時核閱刑案終日不倦端坐斗室如泥塑人待人無鋒稜而臨財不苟有鐵面之稱隨欽使查案山東文武大吏無敢事請託者後莅順寧耿馬土司餽千金却之夷人感頌歷任三府惠政卓著而於原籍建修宗祠捐貲尤多云

王誠義字實之韓城人無爲知州鴻飛從孫幼慧能文弱冠入庠食餼隨侍鴻飛任所潛心爲學舉同治癸酉優貢以教職用光緒丙子登賢書選醴泉訓導丙戌成進士授吏部主事累遷員外郎郎中充考功司幫掌印當官能盡其職不假手於吏胥拳匪之亂留滯京師每讀行在詔書聲淚俱下回鑾後轉御史應詔陳言以

十事進切中時弊人多傳誦陝省鹽飭加價私改官運一事鳳翔
總局委員等壟斷漁利朋比爲奸屠害人畜激成民變巨案大吏
彌縫袒庇遠近詫爲奇聞誠義特疏劾之直聲震都下前後章數
十上皆有關吏治民生所著諫垣未焚草存其家俸滿記名繁缺
知府旋以疾告歸未抵里卒年六十有五誠義友于甚篤撫姪爲
子自奉儉約而解推不吝能繼其家風云

李善初字明復華陰附生祖德傳見前善初以廕賞主事分刑部
四川司海陞郎中截取知府充熱河理刑司熱河都統總理滿漢
蒙事務例以旗員充任惟刑名案件由刑部奏派專員辦理三年
瓜代非諳習刑律實心任事者弗克勝任善初兩任刑司清勤自
勵練軍管帶某獲盜五人請誅之會訊時一犯呼冤謂某索賄不
得有意誣陷都統欲據原摺草供定案處決善初力爭乃發原籍

地方官審辦從輕者二昭雪者一人命重案有以賄託者善初據理爭執攫上官怒弗恤也公餘飲酒賦詩平易近人或干以私則竣拒之光緒二十六年卒於任

竇士範字方海蒲城人順治八年由進士授安徽黟縣知縣清賦稅修縣志培植學校造挹秀橋於石山而民不病涉爲政務持大體人不敢干以私奸胥縮手豪猾斂迹以疾去官士民遮送載道其後科第仕宦遂爲邑中名族七世同炊迄今不替云

張霖潤字子含號柳塘蒲城人父聯捷刑部奉天司郎中兄霖澍道光己酉拔貢甘肅候補知府霖潤由咸豐壬子舉人議叙員外郎分工部營繕司當是時東南軍事孔亟當道勸捐籌餉富家多規避霖潤慨然輸巨貲家計漸落同治初元口逆入陝陷渭南河北郡邑舉辦團練霖潤建議防渭分佈各團而盡繫船於北岸賊

不得逞聞回民將亂致書團練大臣張芾請速爲備張惑於回紳
議撫霖潤策其必敗團衆遂解體旣而回變奉將軍多隆阿檄偕
兄霖澍防堵北山各要路未幾捻匪竄擾霖潤又倡議城守簡丁
壯督操防鄉民恃以無恐事定獎道銜回難旣平乃上書大吏謂
回漢積忿愈深宜勒令省城回民之女出嫁漢人以聯婚媾消隱
患惜不果行尋主堯山書院講席捐廉助膏火是科邑士獲雋者
九人光緒二十六年卒年七十有一子銑光緒辛卯舉人同官訓
導

王育秀字升三號槐堂鄜縣人由廩生登道光丁酉賢書大挑以
教職用歷署武功興平維南學官選授紫陽訓導調關中書院監
院以親老告終養歸官紫陽日值蝗災蔓延縣令將僱夫捕之育
秀請懸重賞使民自爲力並親身督捕往來阡陌間蝗遂滅教士

重實學勗以修己治人之方曰讀書非止絺章櫛句聖賢之學安
全之策講求不可不預也諸生某爲勢家凌轢涉訟幾不免育秀
力救得脫後某卒成進士體恤寒峻解衣推食以成之故門下登
甲乙科者甚多少家貧嗜讀肄業橫渠書院經史性理諸書皆博
覽而約取之晚益肆力性命之學篤好張子全書李二曲反身錄
嘗謂居近前賢宜思繼起若甘暴棄錯過一生矣年六十有一卒
子步瀛有傳

採訪冊

列傳附錄

韓謙字益三長安人以父廷玉克巢縣陣亡襲雲騎尉世職少嗜
讀因貧輟學投西安庫將軍幕同治初回亂隨師邠長間陝境肅
清保藍翎守備又以進剿巴燕戎格克復西寧累保都司參將副
將換花翎光緒庚子隨卮西巡擢總兵歷署提標千總守備平涼

遊擊利橋鹽茶都司靈武參將所至厲卒伍嚴紀律地方安謐而陝餉歸甘散放及請剿回匪義和拳才識尤著陝西提督向駐甘肅固原議以餉糈歸甘散放書吏舞文駁斥謙奉委臯蘭謁總督痛陳利弊吏以二千金爲壽並願歲饋若干峻拒之案乃定循化撤回爭教之亂當道意在息事回匪又甘言厚幣謙請厚集兵力勦撫兼施提督雷正綰易之卒釀巨變旋入武衛後軍提督董福祥幕兼營務處駐京師拳亂初起人多附和謙力排衆議謂非痛剿不可屢諫福祥弗納遂引見歸甘未幾聯軍入京索禍首福祥去職羣情汹汹謙委曲調停猜嫌冰釋福祥感其義贈四萬金弗受以病罷歸民國十三年卒年七十有五

楊鼎昌字種珊長安人原籍江蘇陽湖父某以縣丞需次陝西鼎昌少孤隨母寄外家遂著籍焉同治癸酉甲戌聯捷成進士改庶

吉士選山西靈石知縣丁母憂歸里主講渭南五鳳書院服闋授四川犍爲縣歷權華陽遂寧新繁等縣擢我邊廳通判署綿瀘忠各直隸知州成都知府捐陞道員入民國不仕自號槐市遺民卒于成都年七十餘歲鼎昌爲政尙清靜不事紛更折獄神速一日可結百餘案好爲士子講學文風以振大吏倚重之往往辟充文案性倜儻而正直博通羣書善古文辭著有貽清白齋駢體文鈔詩鈔外編漢魏及明宮詞峽猿吟草

李崇洸字峻臣長安人原籍延川祖宗沆父應疇俱見正傳崇洸少孤賴母氏及叔父應莘教育成立貧苦劬學光緒丙子應縣試院試皆第一遂入學是年秋舉於鄉丁丑聯捷成進士去釋褐僅一年耳授內閣中書魯撫張曜奏調充河防局總辦巡防三載保全甚多而不侵公帑絲毫回京供職暇則與同鄉官設閱書會究

心經世之學以圈點抉擇爲事不屑屑於弃藏久之截取同知分山西授潞安太義鎮同知歷調權霍州忻州等直隸知州所至清訟獄治盜賊尤勤於課士捐廉千金購置書籍提倡詩古文辭及算學晉撫毓賢袒庇拳匪仇視外人忻境教堂男女八人崇泐陰縱之事平擢署蒲州知府調澤州府迴避赴蜀總督岑春煊倚重之派辦廣元賑務積勞成疾特授廣東廉州府尋移潮郡潮缺號稱十萬大吏奏改公費月給二千金餘悉歸公崇泐慨然曰此較寒儒教讀奚啻百倍可以自足矣且居官金錢不能長養子孫每見仕宦之家鮮澤及三世者吾願子孫能自立不欲養成倚賴性質也守潮二載整躬率屬登廉黜庸倡辦工藝嚴禁械鬪振興文學懲戢盜風引疾開缺寓山東省城後營坊日以著述爲樂有易書詩精粹三種及簡易識字通俗印行辛亥政變省垣不靖崇泐